

CONNACIA.

Regio.
Nomina.

Soli qualitas.

Imperium majo-
rum.

Opida.

CONNACIA secunda Hiberniæ pars, aliis *Connachtia*, Anglis *Connagh*, & Hibernis *Connaghty* dicitur. Ad Occasum vergit, Seno flumine, *Banna*, & Oceano inclusa. Hanc antiquitus Ptolemæi ætate *Atteri* & *Nagnata* totam infederunt. Tam arcta verò cognatio inter *Nagnatas* & *Connaghty* intercedere videtur, ut vel *Connaghty* inde enatum, vel hoc nomen *Nagnata* à *Connaghty* detortum existimare liceat. Nisi quis à *Nagnata* portu cuius meminit Ptolemæus *Connaghty* factum suspicetur, & inde regioni nomen impositum. Portus enim *Cuon* patria lingua dicitur, cui si addas *Nagnata* à *Connaghty* non multum abludet. Cæterum regio ut alicubi læta, & ferax, ita subuvidis quibusdam locis, herbidis tamen, quos à mollitie *Bogha* appellant, ut reliqua passim Insula, periculosa, & sylvis opacioribus & crebrioribus condensa. Ora autem maritima multis sinibus, & navigabilibus alveis pervia accolas ad navigationes quodammodo invitat, & provocat, sed innata desidiæ dulcedo ita detinet, ut ostiatim malint victum quærere, quam honestis laboribus paupertatem repellere. In Hibernicis proditum est historiis *Turloghum O-mor O-conor* huic regioni cum Imperio olim præfuisse, totamque inter duos filios, *Cahelum*, & *Brienum* divisisse. Advenientibus vero in Hiberniam Anglis *Rothericus* præfuit, qui Hiberniæ Monarcham se dixit, sed ille mole Anglici belli imminens territus se in *Henrici nostri secundi* fidem, non tentata Martis alea, contulit. Cum autem statim à fide deficeret, *Milo Coganus* primus Anglorum *Connachtiam*, sed irritò incepto, aggressus est. Postea *Guilielmus filius Aldelmi*, cuius posterii de *Burgo*, & *Bourki* Hibernice vocantur, *Gilbertus de Clare* Comes *Glocestrensis*, & *Guilielmus de Bermingham* primi Anglorum hanc regionem perdomuerunt, & ad humanitatem imbuerunt. *Bourkus* vero sive de *Burgo*, & eius posterii totius *Connachtia* Domini appellati, hanc Provinciam cum *Ultonia* diu summa tranquillitate administrarunt, & opimos redditus collegerunt, donec unica *Richardi de Burgo* filia *Connachtia*, & *Ultoniæ* ex affe heres elocata fuerat *Leonello Clarentiæ Duci Regis Edvardi tertii filio*. Cum autem ille in Anglia ut plurimum hæreret, & qui illi successerunt *Mortuomarii*, patrimonium in Hibernia negligentius haberent, *Bourki* affines, quos illi suis terris præfecerunt, *Dominorum absentia*, & turbulentis in Anglia temporibus freti, contempta legum autoritate, inita cum Hibernicis societate, & contractis nuptiis, universam *Connachtiam* sibi occuparunt, & paulatim degenerantes, Anglico cultu deposito, Hibernicos mores induerunt. Hodie in sex comitatus distribuitur: *Claria*, *Letrimme*, *Galveia*, *Roscomin*, *Maio*, *Sligo*. Sunt etiam in hac Baro de *Atterith*, Baro de *Clare*, & alii. Est hic *Galveia*, opidum ab exteris negotiatoribus valde frequentatum, & opulentis mercatoribus suumque negotium bene gerentibus cumulatam. Ferunt *Mercatorem transmarinum* qui habuit cum his opidanis commercium, olim percunctatum ex Hiberno quodam, in qua *Galveia* parte Hibernia consisteret? Opidum pro regione, contraque Insulam pro municipio acceptum. *Galveia* annumerantur *Anneria*, *Claria*, *Sligaia*, *Aretlonia*, & *Alonia*, opidum non contemnendum.